

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATUK JUMAT BIN IDRIS
(SEPANGGAR)**

PERTANYAAN : LISAN

TARIKH : 26.05.2016

Y.B. DATUK JUMAT BIN IDRIS [SEPANGGAR] minta **MENTERI KEWANGAN** menyatakan apakah yang telah dan akan dilaksanakan oleh Kementerian dalam menstabilkan nilai ringgit.

JAWAPAN

Tuan Yang di-Pertua,

1. Izinkan saya menjawab soalan ini bersama-sama dengan soalan oleh Y.B. Bintulu bertarikh 24 Mei 2016, memandangkan kedua-dua soalan tersebut menyentuh isu yang sama iaitu mengenai langkah-langkah menstabilkan nilai ringgit.
2. Berdasarkan perkembangan mata wang terkini, ringgit telah menambah nilai sebanyak 6.4% berbanding dolar AS kepada

RM4.0355 pada 16 Mei 2016 berbanding RM4.2920 pada 31 Disember 2015. Nilai mata wang juga turut mencatatkan prestasi kedua terbaik berbanding mata wang utama and serantau iaitu antara -4.1% sehingga 10.3%. Penambahan nilai ringgit disebabkan oleh sentimen pelabur yang lebih baik yang didorong oleh faktor luaran dan domestik. Faktor-faktor utama yang menyokong kekuatan ringgit termasuk kadar faedah yang rendah atau negatif dalam beberapa ekonomi utama, kelemahan dolar AS berbanding mata wang lain dan pemulihan harga minyak mentah dunia dari paras terendah pada tahun 2015.

3. Selain itu, Kerajaan juga telah berusaha untuk membantu mengurangkan kesan aliran keluar ke atas nilai ringgit. Ini termasuklah melaksanakan langkah-langkah yang menggalakkan syarikat berkaitan Kerajaan untuk membawa balik hasil eksport dalam mata wang asing dan jika perlu, menghadkan aliran keluar dana. Kerajaan telah menubuhkan Jawatankuasa Khas Ekonomi (JKE) pada 20 Ogos 2015, yang melapor terus kepada YAB Perdana Menteri. JKE mempertimbangkan perancangan serta merta dan jangka sederhana bagi mengukuhkan lagi asas ekonomi Malaysia. Ini termasuk, isu semasa seperti nilai ringgit, mengekalkan kestabilan pasaran kewangan serta mengukuhkan keyakinan dalam pasaran modal. Selain itu, Kerajaan juga menyegerakan pelaksanaan cadangan daripada Majlis Eksport Negara (NEC).

Tuan Yang di-Pertua,

4. Pada masa yang sama, komunikasi dan pertemuan dengan penganalisa, pelabur dan agensi penarafan antarabangsa juga telah dipertingkatkan untuk mengukuhkan keyakinan pelabur terhadap Malaysia. Pada mulanya, terdapat salah tanggapan bahawa Malaysia sangat terdedah kepada kesan penurunan harga komoditi. Melalui perbincangan dan interaksi yang aktif, Kerajaan telah menjelaskan bahawa ekonomi Malaysia telah ditransformasikan untuk menjadi lebih pelbagai dan tidak terlalu bergantung kepada sektor komoditi. Sektor komoditi kini hanya menyumbang sebanyak 18% kepada KDNK Malaysia manakala hasil minyak pula hanya menyumbang kira-kira 22% daripada sumber hasil Kerajaan pada 2015.

5. Disebabkan oleh sumber pertumbuhan dan hasil Kerajaan yang lebih pelbagai, Malaysia dapat menikmati pertumbuhan ekonomi yang positif pada tahun lepas dan terus ditunjukkan dalam tahun 2016 iaitu KDNK Suku Pertama Tahun 2016 berkembang pada kadar 4.2%. Selain itu, defisit fiskal terus kekal di landasan konsolidasi. Ini telah membantu dalam mengukuhkan keyakinan pelabur terhadap Malaysia dan mengelakkan aliran keluar dana. Sebagai contoh, susulan pengumuman oleh Kerajaan yang menegaskan komitmennya untuk mengekalkan sasaran defisit fiskal dalam Pengubahsuaian Bajet 2016, ianya telah menyebabkan reaksi pasaran yang positif

pada ketika itu.

Tuan Yang di-Pertua,

6. Walaupun usaha-usaha Kerajaan dalam mengukuhkan ringgit telah membuahkan hasil, namun adalah penting untuk diketahui bahawa sebagai sebuah ekonomi terbuka, negara kita terdedah kepada ketidaktentuan ekonomi global, termasuklah ketidakpastian dasar monetari ekonomi maju dan tren harga minyak mentah global. Perkara ini menyebabkan sentimen pelabur boleh beralih arah di masa hadapan dan akan menyebabkan volatiliti dalam kadar pertukaran ringgit. Sungguhpun demikian, kesan ini dijangka memberi impak yang tidak ketara kepada negara kita memandangkan struktur ekonomi yang kini lebih pelbagai serta disokong oleh asas ekonomi yang meluas, kekukuhan daya tahan dan peningkatan daya saing.

7. Sehubungan itu, dalam jangka masa panjang, prestasi nilai ringgit didorong terutamanya oleh kekuatan asas ekonomi negara yang terus mampan. Justeru, Kerajaan sentiasa mengambil langkah pengurusan makroekonomi yang pragmatik bagi mengekalkan momentum pertumbuhan ekonomi negara. Dalam hal ini, usaha untuk mentransformasikan ekonomi termasuk mempelbagaikan sumber pertumbuhan, pembaharuan fiskal dan langkah untuk memastikan

sistem kewangan yang kukuh dan stabil akan memberi sokongan ke arah pengukuhan nilai ringgit.